



INFORME DE LEGALIDADE SOBRE O ANTEPROXECTO DE LEI REGULADORA DA ACCIÓN EXTERIOR E COOPERACIÓN AO DESENVOLVEMENTO DE GALICIA

Esta Secretaría Xeral Técnica, logo de examinar o *“Anteproxecto de lei reguladora da acción exterior e cooperación ao desenvolvemento de Galicia”*, emite o seguinte

INFORME

I. INTRODUCCIÓN

A Lei 14/2013, do 26 de decembro, de racionalización do sector público autonómico establece que son principios básicos que guían a actuación da Xunta de Galicia a optimización dos recursos públicos, a eficacia na xestión e o logro da máxima coordinación das distintas unidades administrativas.

Para alcanzar a racionalización, simplificación e mellora da calidade normativa a Administración da Comunidade Autónoma de Galicia procurará o mantemento dun marco normativo estable e o máis simplificado posible que posibilite o coñecemento rápido e comprensible da normativa vixente que resulte de aplicación, e sen máis cargas administrativas para a cidadanía e as empresas que as estritamente necesaria para a satisfacción do interese xeral.

Un dos instrumentos previstos na citada Lei para mellorar a calidade normativa é que en todas as iniciativas normativas se xustifique a adecuación das mesmas aos principios de necesidade, proporcionalidade, seguridade xurídica, transparencia, accesibilidade, simplicidade e eficacia.

Por iso, incorporouse, na tramitación do anteproxecto de Lei reguladora da acción exterior e cooperación para o desenvolvemento de Galicia unha memoria específica que xustifica a súa adecuación aos devanditos principios.

Galicia é una nacionalidade histórica constituída como Comunidade Autónoma ao abeiro do previsto na Constitución española. Dende a aprobación do noso Estatuto de Autonomía pola Lei Orgánica 1/1981, do 6 de abril, sucedéronse fondos e substanciais cambios no Ordenamento xurídico español. Sen dúbida un dos máis relevantes foi o ligado á Adhesión de España ás Comunidades Europeas, consonte preveu a Lei Orgánica 10/1985, do 2 de agosto. Isto propiciou unha apertura sen precedentes de España ao exterior e co tempo possibilitou tamén cambios estruturais de enorme transcendencia, como a renuncia a emitir moeda propia, algo inimaxinable tan só uns anos atrás e que semellaba indisociable da natureza de todo Estado soberano. En efecto, conforme reiterada doutrina do Tribunal Constitucional, as Comunidades Autónomas poden levar a cabo accións con proxección exterior, circunscritas ao ámbito das súas competencias estatutariamente recoñecidas e para a promoción dos seus intereses, dentro do necesario respecto ás competencias estatais. Neste contexto, a Comunidade Autónoma de Galicia é unha das máis activas neste eido, por mor de fenómenos como o da nosa diáspora e a acelerada internacionalización da nosa economía, que nos elevou na clasificación de Comunidades exportadoras e expendedoras de bens e servizos. Ao tempo, esta proxección exterior galega tamén se desenvolveu activamente no ámbito da solidariedade internacional e a cooperación para o desenvolvemento como expresión do compromiso da sociedade



galega coa xustiza global dentro do marco definido polo Estado, a Unión Europea e o sistema das Nacións Unidas. Neste sentido, a propia Lei 23/1998, do 7 de xullo, de cooperación internacional para o desenvolvemento, recoñece expresamente, no seu artigo 20, a acción neste eido das Comunidades Autónomas.

A aprobación da Lei 2/2014, do 25 de marzo, da acción e do servizo exterior do Estado, axiña seguida pola Lei 25/2014, do 27 de novembro, de tratados e outros acordos internacionais, abriu novas portas á proxección exterior autonómica. Con este aval, e dentro sempre da indispensable lealdade constitucional, a Xunta de Galicia aprobou o Decreto 178/2015, do 26 novembro, polo que se regula a acción exterior da Comunidade Autónoma de Galicia, en adiante DRAEX, comunicado ao Ministerio de Asuntos Exteriores e Cooperación. No eido da cooperación internacional tamén o Decreto 29/2017, do 9 de marzo, de cooperación para o desenvolvemento, co fin de simplificar e actualizar a normativa de desenvolvemento da Lei 3/2003, do 19 de xuño, de cooperación para o desenvolvemento, en relación ao Rexistro Galego de Axentes de Cooperación para o Desenvolvemento, os órganos de coordinación e asesoramento, as relacións interadministrativas e a xestións das subvencións para proxectos de cooperación, entre outras materias.

Cos devanditos alicerces xurídicos, o Consello da Xunta de Galicia aprobou o 1 de febreiro de 2018 a Estratexia galega de acción exterior Horizonte post 2020, en adiante Egaex, comunicada igualmente ao Ministerio de Asuntos Exteriores e Cooperación, previo informe sen ningún voto en contra do Parlamento de Galicia. Deste xeito, no punto 33 da Egaex incluíuse o compromiso de elevar ao debate parlamentario, e no marco competencial actual, o texto do DRAEX para a súa aprobación final mediante lei do Parlamento de Galicia ao longo da presente lexislatura, como expresión do gran consenso político que aspiramos a fraguar arredor da nosa acción exterior, proxección da capacidade de autogoberno dunha nacionalidade histórica como Galicia. Ademais, no eido da cooperación internacional, o III Plan director da cooperación galega (2014-2017) recoñecía o consenso do sector respecto da necesidade de revisar e actualizar o marco normativo establecido na Lei 3/2003, do 19 de xuño, de cooperación para o desenvolvemento, por canto as súas previsións e disposicións quedarán superadas pola progresiva consolidación e maduración do sistema galego de cooperación. Con este anteproxecto de lei dáse cabal cumprimento daquela a ese compromiso parlamentario e con ela téntase aproveitar ao máximo a marxe de manobra no exterior que permiten o bloque da constitucionalidade e mais as precitadas leis 2/2014 e 25/2014, así como o Ordenamento da Unión Europea, que prevalece sobre a nosa normativa doméstica por mor das obrigas internacionais asumidas polo Reino de España, do que Galicia é parte indisoluble.

Este anteproxecto de lei regula, así, a acción exterior da Comunidade Autónoma conectada coas competencias estatutariamente recoñecidas a esta, tanto con carácter xeral como no eido específico da cooperación para o desenvolvemento; materia esta última ata agora regulada na Lei 3/2003, do 19 de xuño, de cooperación para o desenvolvemento, que é obxecto de derogación. As transformacións da acción exterior a nivel europeo e internacional, motivadas pola globalización en todas as súas dimensións, e a consolidación do multilateralismo demandan de Galicia unha resposta integral e complementaria que sexa quen de atender aos retos e desafíos globais no marco da promoción e defensa dos intereses lexítimos da nosa Comunidade, mais cunha visión máis ampla e holística que de forma coherente contribúa á axenda global de desenvolvemento humano sustentable liderada polas Nacións Unidas. Deste xeito, resulta do máximo interese para Galicia sumarse aos esforzos globais que, dende as políticas públicas domésticas e a acción exterior, están a conseguir avances na erradicación



da pobreza nas súas múltiples dimensións, a redución das desigualdades, a realización efectiva dos dereitos humanos, a implantación de modelos de produción e consumo sustentables, a loita contra o cambio climático e a promoción dunhas relacións internacionais baseadas na paz e na xustiza.

II. ESTRUCTURA DO ANTEPROXECTO NORMATIVO

O presente anteproxecto de Lei reguladora da acción exterior e cooperación para o desenvolvemento de Galicia estrutúrase pois nun título preliminar e noutros dez títulos, seis disposicións adicionais, unha disposición transitoria, unha disposición derogatoria e tres disposicións derradeiras. Con ela aspírase a configurar un marco xeral que posúe vocación de permanencia, a prol dunha acción exterior ao servizo da cidadanía, das entidades públicas, dos axentes e organizacións sociais e civís, así como das empresas galegas e das institucións e comunidades coas que se asocia a Comunidade Autónoma na súas actuacións de cooperación internacional e acción humanitaria.

Consonte coa técnica normativa máis común da UE, o título preliminar recolle o obxecto do anteproxecto de lei, oferta definicións auténticas dos conceptos xurídicos máis relevantes que insire, aglutina os seus principios reitores e define os obxectivos estratéxicos perseguidos, entre os que figuran a aproximación ao produto interior bruto *per cápita* da zona euro da Unión Europea, o achegamento aos estándares socioeconómicos, de calidade de vida, demográficos e ambientais básicos da zona euro da Unión Europea, a meirande diversificación dos mercados exteriores, a captación de capital mercantil e industrial destinado a investimento produtivo, e mais a atracción de capital humano cualificado para o máis acelerado desenvolvemento e consolidación económica de Galicia, que axude a paliar o avellentamento da nosa poboación pola caída da nosa natalidade, así como favorecer o retorno dos/as emigrantes galegos/as e dos seus descendentes. Ademais, tamén se contribuirá á realización da axenda global de desenvolvemento humano sustentable das Nacións Unidas e ás políticas de cooperación internacional e axuda humanitaria do Estado e da Unión Europea, impulsarase a cultura da solidariedade internacional e a conciencia de cidadanía global na sociedade galega e promoverase o europeísmo e unhas relacións internacionais baseadas na paz e a xustiza. Por último, regúlase a representación do sector público autonómico de Galicia sinalando que corresponde á Presidencia da Xunta de Galicia dirixir e coordinar a súa acción exterior.

O título I versa sobre os suxeitos da acción exterior galega, e dos suxeitos privados que concorren, observando como liña definitoria basal a establecida no Dereito da UE, logo incorporada ao Ordenamento xurídico español. Mención singular merece neste punto a Agrupación Europea de Cooperación Territorial “Galicia-Norte de Portugal” (GNP, AECT), dada a súa constitución ao abeiro dunha norma de aplicación directa en Portugal e España, como é o Regulamento (CE) nº 1082/2006 do Parlamento Europeo e do Consello, do 5 de xullo de 2006, modificado polo Regulamento (UE) nº 1302/2013. Esta Agrupación non é daquela unha entidade do sector público galego, senón un organismo bilateral con personalidade xurídica propia, constituído entre a Xunta de Galicia, autorizada polo Consello de Ministros español, e a República Portuguesa, a través neste caso da súa Comisión de Coordinación e Desenvolvemento Rexional do Norte de Portugal, (CCDR-N).

O título II ocúpase de xeito detallado do procedemento para realizar a Programación da acción exterior galega, positivizando e desenvolvendo pautas que xa viñeran inseridas no DRAEX e na propia



Egaex, sendo de especial relevancia a hipotética revisión desta Estratexia se as circunstancias internacionais así o esixiran, sen esquecer o xeito da participación galega na Estratexia española de acción exterior.

O título III céntrase na aplicación da Egaex e na coordinación da acción exterior galega. Sublíñase aquí a conversión definitiva da Egaex no xenuíno eixo central da acción exterior galega, incluíndo como novidade fundamental a regulamentación das recepcións oficiais das autoridades públicas procedentes doutros Estados ou de organismos internacionais, aspecto sobre o que existía unha considerable lagoa no noso Ordenamento que cómpre encher, xa que estas visitas teñen igual ou, ás veces, máis relevancia xurídico-positiva que as viaxes ao exterior de delegacións galegas, dependendo do rango da cabeza da delegación e dos compromisos adquiridos en cada suposto.

A Eurorrexión Galicia-Norte de Portugal e mais a Lusofonía merecen todo o título IV do anteproxecto de lei, considerando o carácter estratéxico da nosa cada vez máis estreita cooperación coa República Portuguesa e cos países da súa comunidade lingüística. Destacando neste eido en especial o papel da entidade Galicia-Norte de Portugal, Agrupación Europea de Cooperación Territorial e da Comunidade de Traballo Galicia-Norte de Portugal, constituída o 31 de outubro de 1991 ao abeiro do Acordo fundamentado no Convenio Marco Europeo sobre Cooperación Transfronteiriza entre Comunidades e Autoridades Territoriais, do Consello de Europa de 1980, hoxe adaptado ás disposicións do Tratado entre o Reino de España e a República Portuguesa sobre Cooperación Transfronteiriza entre Entidades e Instancias Territoriais, do 30 de outubro de 2002, cuxa entrada en vigor se produciu o 30 de xaneiro de 2004.

O título V, Galicia en Europa, reúne no seu primeiro capítulo as cuestións relacionadas coa participación de Galicia nos asuntos da Unión Europea, mentres que reserva o seu segundo capítulo á acción exterior en Europa fóra do marco xurídico da UE, aspecto este a cotío preterido, pero que sen dúbida vai ter unha meirande importancia cando se materialice o abandono definitivo da Unión Europea polo Reino Unido de Gran Bretaña e Irlanda do Norte, considerando o peso e densidade das relacións económicas, sociais e culturais de Galicia con ese Reino.

O aproveitamento das potencialidades que permiten tanto a Lei 2/2014, do 25 de marzo, da acción e do servizo exterior do Estado, como de maneira fundamental a Lei 25/2014, do 27 de novembro, de tratados e outros acordos internacionais, fai que no título VI se aglutinen todas as materias vencelladas cos futuros tratados e outros instrumentos e acordos internacionais nos que poida intervir Galicia. Velaí como se diferencian con nitidez aspectos indispensables en sede doméstica galega, como son a participación na negociación de tratados, a execución en Galicia deses tratados, os acordos internacionais administrativos e mais os acordos internacionais non normativos do sector público autonómico, a previsión doutros acordos de suxeitos públicos, a comunicación e arquivo dos acordos internacionais e, finalmente, a homologación dos memorandos de entendemento para harmonizar as iniciativas das entidades públicas galegas cara afora cando os correspondentes compromisos deban ser plasmados documentalmente en diversos idiomas.

Considerando a diversidade e pluralidade sectorial e institucional das iniciativas no exterior, no título VII deste anteproxecto de lei incorpóranse previsións sobre as correspondentes accións sectoriais alén de Galicia e España, sistematizadas por áreas homoxéneas. A especialidade deste título non implica en



modo algún unha derogación singular das previsións xerais inseridas no resto do anteproxecto de lei, senón unha adecuación dos seus eidos substantivos aos principios e obxectivos básicos da norma.

O amplo título VIII dedícase en exclusiva á cooperación para o desenvolvemento, que constitúe un dos puntais da proxección de Galicia no exterior, actualizando as previsións inseridas na Lei 3/2003, do 19 de xuño, que pasa a ser explicitamente derogada. Este título reflicte os avances e progresos experimentados nos máis de vinte e cinco anos de experiencia da Comunidade Autónoma no eido da cooperación internacional e a acción humanitaria e que teñen configurado unha Cooperación Galega máis especializada sectorial e xeograficamente, con maior complementariedade e eficaz coordinación co Estado e a Unión Europea, con maior valor engadido e con maior capacidade para acadar os resultados de desenvolvemento establecidos na axenda global de desenvolvemento humano sustentable das Nacións Unidas. Este título actualiza e moderniza os principios, obxectivos, criterios e prioridades da Cooperación Galega así como a súa organización institucional e os seus recursos e financiamento co fin de facilitar un espazo de coordinación e complementariedade co resto de axentes públicos e privados de cooperación, en especial coas Administracións Locais e as organizacións que a representan e as organizacións non gobernamentais de desenvolvemento, principais aliadas da Xunta de Galicia na promoción da xustiza global. Dende a creación en 1994 do pioneiro Rexistro Galego de Organizacións Non Governamentais para o Desenvolvemento, en adiante ONGD, a Xunta de Galicia ten recoñecido o labor das ONGD na progresiva consolidación e modernización desta política pública a nivel estratéxico e operativo, mantendo un constante diálogo coa Coordinadora Galega de ONGD e apoiando o seu fortalecemento institucional. Ao tempo, o Fondo Galego de Cooperación e Solidariedade, como entidade representativa da cooperación municipalista das entidades locais galegas adheridas ao mesmo, ten acompañado o labor da Administración pública e das ONGD na configuración dun sistema galego de cooperación de valor estratéxico e coherente cos principios e valores da solidariedade internacional. Por estes motivos, a Coordinadora Galega de ONGD e o Fondo Galego de Cooperación e Solidariedade son recoñecidos como interlocutores permanentes da Xunta de Galicia.

No título IX actualízase o réxime relativo ás delegacións e oficinas autonómicas no exterior, adaptando as súas previsións á Lei 2/2014, do 25 de marzo, da acción e do servizo exterior do Estado, coa finalidade primordial de mellorar a coordinación, minorar custes e garantir o respecto ás competencias estatais.

A nova realidade da mobilidade internacional de profesionais e empresas, cada vez máis e mellor formados e capitalizadas, aconsellou innovar no título X todo o relacionado coas novas redes de intereses galegos no exterior, que amosan un modelo de actuación á marxe das tradicionais comunidades galegas da nosa antiga diáspora. No caso das persoas físicas para garantir unha mellor atención pola Administración autonómica e para manter e estreitar os lazos subxectivos con Galicia, ante novos fenómenos que xa pouco teñen que ver coa realidade social e económica dos pasados dous séculos, estimando a inmediatez que fornecen as modernas telecomunicacións ou mesmo os novos medios de transporte. E, no caso das empresas, porque cómpre adaptarnos a unha realidade que esixe atender a demandas foráneas rapidamente cambiantes para, así, posibilitar a creación dunha anovada oferta de traballo para a cidadanía galega mellor capacitada que nunca na nosa historia.

A disposición adicional primeira dedícase ao Consello da Cultura Galega, Institución prevista no artigo 32 do noso Estatuto de Autonomía, coa finalidade de atender ás obrigas e facultades da Comunidade



Autónoma na defensa e promoción dos valores culturais do pobo galego. O cumprimento dos seus fins, dentro e fóra da Comunidade Autónoma baséase no recoñecemento da transterritorialidade do pobo galego como consecuencia dunha diáspora secular.

A Fundación Galicia Europa é merecedora pola súa banda dun tratamento singular na disposición adicional segunda, por canto ven prestando servizo ininterrompido dende 1988 e porque está constituída, ademais de pola Xunta de Galicia, por diversas deputacións provinciais, pola Zona franca de Vigo e por entidades financeiras, sendo un exemplo vivo e único de cooperación entre diversas administracións públicas e de colaboración con entidades privadas galegas, algo que fica no mesmo espírito desta lei como desexable e necesario.

A disposición adicional terceira prevé a posibilidade de acadar apoios extraordinarios ás delegacións exteriores da Xunta de Galicia, nun intento de minimizar os custos de xestión no seu caso e de aproveitar o capital humano do propio sector público, pensando na existencia de picos de traballo e de necesidades puntuais que atender, sen por iso incrementar o gasto estrutural no capítulo de persoal.

Cun propósito similar, de optimización dos recursos humanos, a disposición adicional cuarta abre a porta á participación do persoal do Sistema público de saúde de Galicia en emerxencias humanitarias, baixo os parámetros do réxime do voluntariado sanitario internacional, unha axuda impagable polo alto nivel de cualificación destes profesionais e pola necesidade de atender situacións extraordinarias de risco para a saúde pública que doutro xeito sería moi difícil poñer en marcha coa debida dilixencia.

As disposicións adicionais quinta e sexta refírense ao cumprimento da axenda global de desenvolvemento humano sustentable e á designación de responsables do seguimento da participación de Galicia nos asuntos da Unión Europea.

Pola súa banda, a disposición transitoria única mantén que en tanto non se regulen os coeficientes por razón de servizo que poidan corresponder ao persoal da Xunta de Galicia por residencia no estranxeiro, aplicaranse supletoriamente os establecidos no ámbito da Administración Xeral do Estado.

A disposición derogatoria única derroga expresamente á Lei 3/2003, do 19 de xuño, de cooperación para o desenvolvemento, que fora novidosa e moi avanzada no seu día, pero que xa cumpríu o seu ciclo, sendo demandada polas organizacións non gobernamentais para o desenvolvemento e por outros axentes do sector unha nova norma máis acaída cos tempos e cos progresos advertidos no eido internacional.

Por último, a habilitación normativa e a previsión da entrada en vigor da lei aparecen recollidas nas disposicións derradeiras, para garantir a pacífica transición e o mantemento da seguridade xurídica neste eido, consubstancial a un Estado constitucional e de Dereito pertencente á UE.

Con este anteproxecto de Lei reguladora da acción exterior e cooperación para o desenvolvemento de Galicia, a nosa Comunidade Autónoma dá un paso de xigante na progresión do seu Ordenamento e demostra que se pode ser ambicioso en moitas áreas de interese para o país sen por iso petar co marco constitucional e coa lealdade institucional que lle é inherente.

III. TRAMITACIÓN DO ANTEPROXECTO DE LEI





O Consello da Xunta de Galicia acordou na súa reunión do 18 de xullo de 2019 autorizar o inicio da tramitación do anteproxecto de lei.

Ademais da intervención das consellerías da Xunta de Galicia, aos efectos de dar cumprimento ao trámite de audiencia e información pública, en cumprimento do artigo 133 da lei 39/2015, do 1 de outubro, o anteproxecto foi obxecto de consulta pública previa entre o 8 e o 28 de febreiro de 2019 no portal de Transparencia e Goberno aberto. Como consecuencia desta difusión presentáronse suxestións por parte de:

- Axencia Galega de Innovación (GAIN)
- Fondo Galego de Cooperación e Solidariedade
- Instituto Galego de Análise e Documentación Internacional (IGADI)
- Coordinadora galega de ONG para o desenvolvemento

Igualmente durante o período comprendido entre o 26/07/2019 e o 15/09/2019 (en cumprimento do disposto no artigo 9 da Lei 1/2016, do 18 de xaneiro, de transparencia e bo goberno) expúxose publicamente na fase “En prazo de envío de suxestións”, do portal de Transparencia e Goberno aberto, o texto íntegro do anteproxecto de lei. Tras ese trámite recibíronse alegacións de:

- Coordinadora galega de ONG para o desenvolvemento
- Fondo Galego de Cooperación e Solidariedade
- Empresa ICARTO
- FEGAMP
- Instituto Galego de Análise e Documentación Internacional (IGADI)
- Grupo de Estudos Internacionais (GRESIN)- USC

Neste mesmo trámite, por parte da administración xeral, fixeron observacións as consellerías de Cultura e Turismo, Sanidade (a través do SERGAS), Facenda (a través da ATRIGA), a Presidencia da Xunta de Galicia (a través da AMTEGA), a Dirección Xeral de Avaliación e Reforma Administrativa e a Secretaría Xeral da Igualdade.

O anteproxecto de lei presentouse así mesmo, ao Ministerio de Asuntos Exteriores, Unión Europea e Cooperación, remitindo este alegacións de sistemática e estilo.

A maiores, someteuse o anteproxecto ao informe de dous órganos consultivos: o Consello Galego de Acción Exterior (CAEX) e o Consello Galego de Cooperación para o Desenvolvemento (CONGACODE).

Unha vez vistas e analizadas as alegacións formuladas, a Dirección Xeral de Relacións Exteriores e coa Unión Europea, promotor do anteproxecto de lei, emite o seu informe sobre as alegacións o 2 de decembro de 2019.

IV. INFORMES E DITAMES

O anteproxecto de lei foi informado polos seguintes órganos:

- Informe de impacto de xénero da Secretaría Xeral da Igualdade do 8 de agosto de 2019.



- Certificados dos acordos favorables ao anteproxecto emitidos polo Consello Galego de Cooperación para o desenvolvemento (CONGACODE) e o Consello de Acción Exterior de Galicia (CAEX) o 25 de novembro de 2019.
- Informe da Dirección Xeral da Función Pública do 29 de xaneiro de 2020.
- Informe da Dirección Xeral de Avaliación e Reforma administrativa do 29 de xaneiro de 2020.
- Informe da Dirección Xeral de Planificación e Orzamentos do 29 de xaneiro de 2020.

De conformidade co Decreto 343/2003, do 11 de xullo, polo que se aproba o regulamento orgánico da Asesoría Xurídica da Xunta de Galicia, solicitouse informe da Asesoría Xurídica Xeral o 9 de xaneiro de 2020. Tras proceder ao seu estudo, formulando as observacións xerais e específicas sobre o dito anteproxecto normativo, emite o seu informe favorable o 29 de xaneiro de 2020.

O tratamento das observacións recóllese no informe elaborado pola Dirección Xeral de Relacións Exteriores e coa Unión Europea, que se incorpora ao expediente. Así mesmo, este centro directivo achega o texto definitivo.

V. LEGALIDADE

De acordo co indicado considérase que o *“Anteproxecto de lei reguladora da acción exterior e cooperación ao desenvolvemento”*, reúne as condicións esenciais para a súa aplicación e efectividade, polo que se informa favorablemente o mesmo.

A persoa titular da Secretaría Xeral Técnica, logo de ver a proposta do subdirector xeral de Réxime Xurídico, da Vicepresidencia e Consellería Presidencia, Administracións Públicas e Xustiza, considera que o anteproxecto de lei sometido a informe se axusta á legalidade vixente, polo que o **informa favorablemente**.

Santiago de Compostela, 30 de xaneiro de 2020

A secretaria xeral técnica da Consellería de Presidencia, Administracións Públicas e Xustiza